



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-1/21-3-40-133-4/22**
Datum: **06.04.2022. godine**

„Agencija za vodno područje rijeke Save“ Sarajevo rješavajući po zahtjevu Općine Orašje za donošenje rješenja o vodnoj dozvoli za zahvatanje vode iz obnovljenog bunara B1 i ispuštanje tehnoloških otpadnih voda iz Postrojenja za pročišćavanje pitke vode Orašje PPPV „Kostrč“, na osnovu člana 139. stav 1. tačke 1. i 3. Zakona o vodama („Službene novine Federacije BiH“, broj 70/06) i člana 200. stav 1. Zakona o upravnom postupku („Službene novine Federacije BiH“ br. 2/98 i 48/99), donosi

RJEŠENJE **o vodnoj dozvoli**

1. Daje se vodna dozvola Općini Orašje, za zahvatanje vode sa obnovljenog bunara B1 i ispuštanje tehnoloških otpadnih voda iz Postrojenja za pročišćavanje pitke vode Orašje PPPV „Kostrč“ kapaciteta 50,0 l/s. Objekti su izgrađeni na zemljištu označenom kao k.č. broj: 217 K.O. Kostrč, općina Orašje.
2. Vodna dozvola se daje na osnovu dostavljene dokumentacije, uviđaja na objektima, utvrđenog činjeničnog stanja i uz slijedeće uslove:
 - 2.1. Da se predmetni objekti održavaju u funkcionalnom stanju u skladu sa njihovom prirodom i namjenom i izdatim vodnim.
 - 2.2. Da se korisnik vodnih objekata brine o čuvanju vodnih objekata i uređaja na njima od slučajnog ili namjernog oštećenje ili uništenja.
 - 2.3. Da mjerne uređaje (mjerace protoka) za mjerenje količina zahvaćene-ispuštene vode održava u ispravnom stanju, odnosno obavezno vrši redovno baždarenje istih u skladu sa propisima o mjernim uređajima.
 - 2.4. Da korisnik predmetnih objekata obezbijedi stalni i sistematski pregled vode, od strane ovlaštene laboratorije, te poduzme sve potrebne mjere za osiguranje zdravstveno ispravne vode za piće.
 - 2.5. Da se, ukoliko se redovnim ili vanrednim analizama kvaliteta vode utvrdi da ova ne zadovoljava uslove vode za piće, propisane Pravilnikom o higijenskoj ispravnosti vode za piće („Službeni glasnik BiH“, br. 40/10, 43/10, 30/12 i 62/17), vodovodni sistem isključi iz upotrebe, odnosno blagovremeno i na adekvatan način obavijeste krajnji potrošači da voda nije za piće.
 - 2.6. Da se na području vodozahvatne zone sprovede zaštitne mjere za izvorišta, a po Odluci o zaštiti izvorišta vode za piće „Kostrč“, broj: 01-02-749/20 od 30.07.2020. godine („Službeni glasnik Općine Orašje“ broj 4/20).
 - 2.7. Ogradu i ograđeni prostor oko vodocrpilišta „Kostrč“, Općina Orašje potrebno je održavati što znači da je ovaj prostor potrebno kositi, uklanjati samoniklo šiblje i grmlje i isti obezbijediti i drugim mjerama fizičke zaštite i osiguranja, a što prvenstveno uključuje službu fizičkog obezbjeđenja na izvorištu (povremeni obilazak ili stalna posada), te alarm i druge mjere zaštite, ukoliko se to ocijeni potrebnim.
 - 2.8. Da se vrši stalna dezinfekcija vode hlorisanjem kao i kontrola rezidualnog hlora u gradskoj mreži, a u skladu sa Pravilnikom o higijenskoj ispravnosti vode za piće.
 - 2.9. Da se tehnološke otpadne vode iz postrojenja za pročišćavanje pitke vode, nastale pranjem filtera, odmuljivanjem taložnika i slično, prikupljaju zasebnim sistemom kanalizacije i preko okna za monitoring ispuštaju u postojeći otvoreni kanal za odvodnju oborinskih voda.
 - 2.10. Da se redovno vrši tretman mulja nastalog radom postrojenja, te isti privremeno skladišti na ekološki prihvatljiv način. Konačno zbrinjavanje mulja povjeriti ovlaštenoj organizaciji.
 - 2.11. Da se redovno vrši kontrola uskladištenih hemikalija i obezbijede svi potrebni uslovi za sprječavanje zagađenja površinskih i podzemnih voda uskladištenim materijama.
 - 2.12. Da se redovno vodi dnevnik rada u koji će se unositi podaci o potrošnji svih hemikalija.

- 2.13. Da se u cilju kontrole, evidencije i plaćanja količina zahvaćene vode vrši mjerenje količina zahvaćene vode, a mjerni uređaj stalno održava u ispravnom stanju, odnosno redovno vrši baždarenje mjerača protoka u skladu sa propisima o mjernim uređajima. Evidenciju o mjerenjima zahvaćenih količina vode vršiti u skladu sa Pravilnikom o sadržaju i načinu vođenja evidencije i dostavljanje podataka o količinama zahvaćene vode („Službene novine FBiH“ br. 83/08).
- 2.14. Da se, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vrši redovno ispitivanje kvaliteta otpadnih voda uzimanjem uzorka efluenta iz okna za monitoring na mjestu ispusta u skladu sa Uredbom o uslovima ispuštanja otpadnih voda u okoliš i sistem javne kanalizacije („Službene novine Federacije BiH“ broj: 26/20 i 96/20). Učestalost i način ispitivanja vršiti u skladu sa članom 20. Uredbe o uslovima ispuštanja otpadnih voda u okoliš i sisteme javne kanalizacije. Rezultate analiza dostaviti ovoj Agenciji.
3. Korisnik objekata treba da vrši mjerenja količina zahvaćenih i ispuštenih voda i o tome vodi evidenciju na propisanim obrascima, da podatke o mjerenjima unosi u propisane mjesečne izvještaje i iste redovno dostavlja ovoj Agenciji na način, po postupku i u rokovima određenim Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH“, broj 92/07, 46/09, 79/11 i 88/12). Korisnik objekata je obavezan vršiti plaćanje posebne vodne naknade u skladu sa članom 170 stav 1. tačka 1. alineja 1 i tačka 3. alineja 2 Zakona o vodama i Odlukom o visini posebnih vodnih naknada („Službene novine Federacije BiH“, broj 46/07, 10/14 i 03/16).
4. Prava stečena po ovoj dozvoli ne mogu se prenositi na treća lica.
5. Ukoliko radom predmetnog objekta dođe do promjene režima površinskih ili podzemnih voda, a te promjene prouzrokuju štete ma kakvog karaktera, korisnik vodne dozvole je obavezan uzroke štete otkloniti, a nastalu štetu nadoknaditi.
6. U ovoj upravnoj stvari plaćene su sve upravne pristojbe.
7. Ova vodna dozvola, shodno članu 117. stav 1. Zakona o vodama se daje sa rokom važenja od 5 (pet) godina od dana pravosnažnosti ovog rješenja.
8. Po isteku važenja ove vodne dozvole korisnik je dužan ovoj Agenciji podnijeti zahtjev za izdavanje nove vodne dozvole.
9. U periodu važenja ove dozvole korisnik iste je dužan provoditi sve mjere i aktivnosti propisane ovom dozvolom.
10. Ovo Rješenje može se izmijeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

Obrazloženje

Dana 15.03.2022.godine, Općina Orašje podnijela je ovoj Agenciji zahtjev za donošenje rješenja o vodnoj dozvoli za zahvatanje vode sa obnovljenog bunara B1 i ispuštanje tehnoloških otpadnih voda Postrojenja za pročišćavanje pitke vode PPPV Kostrč, općina Orašje.

U provedenom postupku, uz zahtjev za izdavanje vodne dozvole dostavljena je i pregledana slijedeća dokumentacija:

- Ovjerena kopija Uvjerenja o poreskoj registraciji izdatog 30.09.2011.godine od strane Porezne uprave – Kantonalni ured Orašje;
- Ovjerena kopija Uvjerenja o registraciji/upisu obveznika indirektnih poreza, broj: 04/1-17-1-35-182-2/10 izdatog 19.05.2010.godine, od strane Uprave za indirektno-neizravno oporezivanje Banja Luka;
- Ovjerena kopija Obavijesti o razvrstavanju pravne osobe prema klasifikaciji djelatnosti, broj: 07-32.5-7/11 izdate 30.09.2011.godine od strane Službe za statistiku za područje Posavsko kantona;
- Ovlaštenje zastupnika podnosioca zahtjeva, broj: 01-23-1249/19 od 15.04.2020.godine;
- Kopija Rješenja o odobrenju za građenje postrojenja za pročišćavanje pitke vode Orašje –PPPV „Kostrč“, broj: 06-19-1126/2020 izdatog 14.10.2020. godine od strane Službe prostornog uređenja i imovinsko-pravnih poslova općine Orašje;

- Kopija Rješenja o vodnoj saglasnosti, broj: UP/I/25-2-40-514-2/20 izdatog 30.11.2020.godine od strane ove Agencije,
- Kopija Rješenja o vodnoj dozvoli za zahvatanje vode sa bunara B2, broj: UP-I/25-3-40-268-6/18 izdatog 30.04.2021.godine JP „Vodovod i odvodnja“ d.o.o. Orašje od strane ove Agencije,
- Kopija Odluke o zaštiti izvorišta vode za piće „Kostrč“, broj: 01-02-749/20 donesene 30.07.2020. godine od strane Općinskog vijeća Orašje („Službeni glasnik Općine Orašje“ broj 4/20)
- Glavni projekat (CD): Projektiranje i izgradnja postrojenja za pročišćavanje pitke vode (PPPV) i uvezivanje u sustav vodoopskrbe – Postrojenje za pročišćavanje pitke vode Orašje PPPV Kostrč, broj projekta: 1231/2020, urađen avgusta 2020. godine od strane «ESOTECH» Velenje - Slovenija, nostrificiran od strane «ENERGOINVEST» d.d. Sarajevo:
 - Knjiga 0 – Opći dio
 - Knjiga 1 – Arhitektonsko građevinski dio
 - Knjiga 2 – Građevinske konstrukcije
 - Knjiga 3 – Elektroinstalacije
 - Knjiga 4 – Strojarsko tehnološki dio
- Dokaz o uplati upravne takse za izdavanje vodnog akta.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 12. stav 5. i 6. Pravilnika o sadržaju, obliku i uvjetima i načinu izdavanja i čuvanja vodnih akata („Službene novine Federacije BiH“, broj 31/15, 55/19 i 41/20), izvršen je obilazak predmetnog izvorišta te je sačinjen zapisnik o izvršenom uviđaju broj: UP-1/21-3-40-133-3/22 od 24.03.2022. godine.

Na osnovu dostavljene dokumentacije i izvršenog uviđaja na licu mjesta utvrđeno je sljedeće:

Vodosnabdijevanje grada Orašja te naselja Ugljara, Donja Mahala, Tolisa, Kostrč i Vidovice riješeno je zahvatanjem vode (bunarima B1 i B2) sa izvorišta Kostrč. Uz bunare je ranije izgrađen vodotoranj i servisna zgrada sa laboratorijom i skladištem hemikalija.

Za zahvatanje vode sa novog bunara B2 ova Agencija je izdala vodnu dozvolu korisniku JP „Vodovod i odvodnja“ d.o.o. Orašje (UP-I/23-3-40-268-6/18 od 01.08.2018.godine). U vrijeme izdavanja ove dozvole stari bunar B1 nije bio u funkciji a obnovljen je u sklopu projekta izgradnje postrojenja za pročišćavanje vode za piće.

Obzirom da sirova voda konstantno sadrži željezo i mangan u koncentracijama iznad maksimalno dopuštenih vrijednosti sa povremenim povećanim koncentracijama amonijaka uz bunare i postojeći vodotoranj izgrađeno je i postrojenje za pročišćavanje vode za piće kapaciteta 50 l/s.

Novo postrojenje za pripremu pitke vode čine sljedeće komponente:

- Bunarske crpke (nova na bunaru B1 i stara na bunaru B2)
- Aeracijski stub u kojem se vrši aeracija
- Bazen aerisane vode
- Crpna stanica za punjenje filtera,
- Oksidacija – doziranje kalijevog permanganata,
- Medijski filteri i oprema za ispiranje,
- Taožni bazen
- Rezervoar vode za ispiranje filtera (90m³)
- Uklanjanje mulja – dehidracijske vrećice
- Dezinfekcija vode sa ClO₂
- Crpna stanica za pročišćenu vodu.

Za mjerenje količine zahvaćene vode ugrađen je novi mjerač protoka na ulazu u PPPV a na izlaznom cjevovodu prečišćene vode u vodotoranj koristi se postojeći mjerač protoka.

Tehnološke otpadne vode nastale u postupku ispiranja filtera sakupljaju se i odvođe do taložnog bazena zapremine 180 m³ izgrađenog iza filterske stanice. Istaložena otpadna voda se pumpa u okno za monitoring a zatim ispušta u postojeći otvoreni kanal. Za kontrolu kvaliteta vode prije ispusta iz taložnika ugađen je automatski mjerač mutnoće.

Istaloženi mulj iz taložnika se crpkom transportuju u sistem za dehidraciju mulja. Dehidrirani mulj se pakuje u vreće i privremeno odlaže na predmetnom lokalitetu do konačnog zbrinjavanja od strane ovlaštene firme.

Smještaj hemikalija se vrši u namjenskoj prostoriji opremljenoj tankvanama za prihvrat rasutih hemikalija u slučaju havarije.

Postrojenje PPPV-a je opremljeno sa svom potrebnom opremom za lokalni i daljinski nadzor te centralnim procesorskim sistemom za nadzor i upravljanje.

Svi radovi na izgradnji postrojenja i obnovi bunara urađeni su u skladu sa Rješenjem o vodnoj saglasnosti broj: UP-I/25-40-2-514-2/20 izdatim 30.11.2020.godine od strane ove Agencije.

U toku uviđaja na terenu postrojenje nije bilo u funkciji. U toku je procedura ishodovanja Rješenja o upotrebnoj dozvoli. Nakon okončanja probnog rada postrojenja i ishodovanja upotrebne dozvole isto će biti predato na upravljanje JP „Vodovod i odvodnja“ d.o.o. Orašje, koje je dužno da u skladu sa tačkom 9. dispozitiva ovog rješenja obavijesti „Agenciju za vodno područje rijeke Save“ Sarajevo o promjeni korisnika objekata te zatraži izmjenу Rješenja o vodnoj dozvoli.

Podnosilac zahtjeva uplatio je posebne troškovi prema Zaključku ove Agencije broj: UP-1/21-3-40-133-2/22 od 22.03.2022.godine.

Na osnovu provedenog postupka, a prema članu 17. stav 1. i 2. Zakona o vodama, u svrhu ostvarivanja prava na vodu drugim korisnicima kao i održivog korištenja voda, korisniku objekata ovom su vodnom dozvolom, u tački 2. dispozitiva rješenja, propisani uslovi korištenja objekata. Podnosilac zahtjeva, kao korisnik objekata obavezan je pridržavati se navedenih uslova, u skladu sa članovima 48., 64. i 66., 116. Zakona o vodama i članovima 13. i 14. Pravilnika o sadržaju, obliku i uvjetima i načinu izdavanja i čuvanja vodnih akata.

Tačka 3. dispozitiva Rješenja je propisana u skladu sa tačkama 4. i 27. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada («Službene novine Federacije BiH», broj 92/07, 46/09, 79/11, 88/12 i 03/16) i Odlukom o visini posebnih vodnih naknada («Službene novine Federacije BiH», broj 46/07).

Konstatuje se da je podnosilac zahtjeva, ispunio minimum uslova za izdavanje vodne dozvole za zahvat vode sa bunara B-2, u svrhu obezbjeđenja potrebnih količina vode za piće stanovništva i privrede koje se vodom snabdijeva putem javnog vodovodnog sistema, na području grada Orašje i ispuštanje otpadnih voda sa Postrojenja za pročišćavanje pitke vode Orašje PPPV „Kostrč“, te je riješeno kao u dispozitivu ovog rješenja.

Podnosilac zahtjeva je uplatio upravnu taksu u skladu sa Zakonom o izmjenama i dopunama zakona o federalnim upravnim taksama i tarifi federalnih upravnih taksi («Službene novine Federacije BiH», broj 06/98, 8/00, 45/10, 43/13 i 98/17).

Uputa o pravnom lijeku:


Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva u roku od petnaest dana od dana prijema Rješenja.

Žalba se predaje ovom organu neposredno ili preporučeno poštom. Žalba se taksira sa 15 KM administrativne takse prema tarifnom broju 3. Tarife federalnih administrativnih taksi.

Obradivač akta:

Roksanda Školjić, dipl.inž.građ.

 Po ovlaštenju:
Rukovodilac sektora za izdavanje
vodnih akata


Haris Ališehović, dipl.inž.građ.

Dostaviti:

- Općina Orašje,
3. ulica br. 45, 76270 Orašje
- AVP Sava, ISV-vodna knjiga
- Sektor 50
- ☉ Sektor 40 – arhiva
- Oglasna ploča – AVP Sava